

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ  
ҚАРОРИ**490** Ҳар йили ёнғин хавфсизлиги ойлигини ўтказиш  
тўғрисида

Ўзбекистон Республикаси ҳудудида куз-қиш иситиш мавсуми олди-дан ёнғинларнинг олдини олиш ҳамда ёнғин хавфсизлигини таъминлаш чора-тадбирларини кучайтириш мақсадида Вазирлар Маҳкамаси **қарор қилади:**

1. Ўзбекистон Республикаси Ички ишлар вазирлигининг ҳар йили ноябрь ойининг учинчи ўн кунлигидан бошлаб ёнғин хавфсизлиги ойлигини ўтказиш тўғрисидаги таклифи қабул қилинсин.

Куйидагилар ёнғин хавфсизлиги ойлигининг асосий вазифалари этиб белгилансин:

иқтисодиёт тармоқлари ва ижтимоий соҳа объектларини, шунингдек уй-жой фондини ёнғин хавфсизлиги талабларига мувофиқ ҳолга келтириш;

ўта муҳим давлат аҳамиятига молик ёки ёнғин ва портлаш хавфи юқори бўлган объектларда ёнғин хавфсизлигини мустаҳкамлаш бўйича комплекс чора-тадбирларни амалга ошириш.

2. Ёнғин хавфсизлиги ойлигини ўтказиш даврида Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари:

ёнғин хавфсизлиги ойлигини ташкил этиш ва ўтказиш комиссияларининг тузилишини;

ёнғин хавфсизлиги ойлигини самарали ўтказиш тадбирлари ишлаб чиқилишини, уларда ёнғин хавфсизлигини таъминлашга дахлдор бўлган барча тегишли идораларнинг вазифалари тақсимланишини;

жамоат транспортида ва аҳоли кўп тўпланадиган жойларда ёнғин хавфсизлиги ойлиги ўтказилаётгани ҳақида реклама ёзувларни, плакатлар жойлаштирилишини;

ҳар ўн кунда ёнғин хавфсизлиги ойлиги ўтказилиши муҳокама қилинишини ва унда тегишли раҳбарларнинг ҳисоботлари эшитилишини ҳамда ёнғин хавфсизлигини таъминлашга жамоатчилик кенг жалб этилишини таъминласинлар.

3. Ёнғин хавфсизлиги ойлигини ўтказиш даврида давлат ва хўжалик бошқаруви органлари, бошқа ташкилотлар раҳбарлари:

ҳайъатлар, бошқарувлар, кенгашлар мажлисларида идоравий мансуб объектлар ва уй-жой фондининг техник ҳолати, ёнғин хавфсизлиги масалаларини кўриб чиқсинлар;

газ, энергетика, сув хўжалиги ва иситиш мосламаларининг ҳолати ва созлигига алоҳида эътибор қаратсинлар;

ташкилотларнинг объектлари ва уй-жой фондини ёнғинга хавфсиз ҳолатга

келтириш учун ажратилган маблағлардан қатъий равишда мақсадли фойдаланилиши устидан назорат ўрнатилишини таъминласинлар;

ёнғин хавфсизлиги меъёрлари бузилишининг ҳар бир ҳолати бўйича пухта текширувлар ўтказсинлар, ёнғин рўй беришига йўл қўйган раҳбарларга нисбатан қонун ҳужжатларига мувофиқ таъсир чораларини кўрсинлар;

объектлардаги ёнғин хавфсизлиги бўлинмаларини ёнғин ўчириш техникаси, асбоб-ускуналар ва анжомлар билан таъминлаш чора-тадбирларини кўрсинлар;

ишчилар, хизматчилар, таълим муассасалари ўқувчилари ва аҳоли ўртасида ёнғинга қарши тарғибот ўтказиш ва ёнғин хавфсизлиги чора-тадбирларини қўллашни ўргатиш ишларини кучайтирсинлар, жамоатчиликни ёнғинларнинг олдини олиш тадбирларига кенг жалб этсинлар;

ўзига қарашли ёнғинга қарши ҳимоя тизими ва воситаларини, ёнғинга қарши сув таъминоти манбаларини (гидрантлар, резервуарлар, сув ҳавзалари, ички ёнғин ўчириш жўмакларини) соз ҳолатга келтириш чора-тадбирларини кўрсинлар.

4. Ўзбекистон Республикаси Ички ишлар вазирлиги, Ўзбекистон матбуот ва ахборот агентлиги, Ўзбекистон Миллий ахборот агентлиги, Ўзбекистон миллий телерадиокомпанияси, оммавий ахборот воситалари:

ёнғин хавфсизлиги ойлигининг ўтказилишини оммавий ахборот воситаларида кенг ёритиб борсинлар, ёнғин хавфсизлиги бўйича махсус мавзули видеороликлар тайёрласинлар, уларнинг тадбир давомида мунтазам равишда намойиш этиб борилишини таъминласинлар;

фуқароларнинг ўзини ўзи бошқариш ва ёнғин назорати органлари билан биргаликда ёнғин хавфсизлигини таъминлаш масалалари узоқ вақтдан буён ҳал этилмай келинаётган объектлар ва аҳоли пунктлари бўйича рейдлар уюштирсинлар;

хомийларнинг маблағларини жалб этган ҳолда ёнғин хавфсизлиги ойлигининг мақсадлари, вазифалари ва ўтказилишини тарғиб қилувчи плакатлар, буклетлар ва кўргазмалар тарғиботнинг бошқа турлари чоп этилишини ташкил қилсинлар.

5. Давлат ва хўжалик бошқаруви органлари раҳбарлари, Қорақалпоғистон Республикаси Вазирлар Кенгаши Раиси, вилоятлар ва Тошкент шаҳар ҳокимлари зиммасига ёнғин хавфсизлиги ойлиги ўтказилиши учун шахсий жавобгарлик юклансин.

6. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари, давлат ва хўжалик бошқаруви органлари ҳамда бошқа ташкилотлар ҳар йили ойлик тугагандан сўнг қилинган ишлар тўғрисида 10 кун муддатда Ўзбекистон Республикаси Вазирлар Маҳкамасига ахборот берсинлар.

7. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари — Коммунал соҳа, транспорт, ка-

питал қурилиш ва қурилиш индустрияси масалалари комплекси раҳбари зиммасига юклатилсин.

**Ўзбекистон Республикасининг  
Бош вазири**

**Ш. МИРЗИЁЕВ**

Тошкент ш.,  
2011 йил 18 ноябрь,  
309-сон